

– Sevimli gazetam har bir o'quvchining xonadoniga
kirib borishini istayman, – deydi xorazmlik
tengdoshingiz Matluba EGAMBERGANOVA



Tong YULDUZI

O'zbekiston Respublikasi bolalari va o'smirlari gazetasi

2007-yil
23 – 29 - iyul
N:30
(66623)

Gazeta 1929-yil 1-avgustdan chiqib boshlagan

DUSHANBADAN

XUSHXABARLARDAN QUVONAMAN

Mustaqillik tengdoshi bo'lganim uchun ham yurtimdagi har bir o'zgarish, yangilig-u xushxabarlardan doimo quvonib yashayman. Yurtimiz g'allakorlarining mamlakatimizda birinchi marta 6 million 250 ming tonnalik g'alla xirmoni bunyod etganlari-yu, ularga Prezident bobomizning tabrik yo'llaganlarini o'qib, behad mamnun bo'ldim va bu to'g'risida darhol sevimli gazetamga xat yo'llashga ahd qildim.

Yurtimning baxtli qizi sifatida biz uchun shunchalik ko'p rizq-ro'z yetishtirayotgan g'allakorlarning kelgusida bundan ham ulkan zafar quchishlarini istab qolaman.

TALABALAR - «BUYUK O'ZBEK YO'LI»DA

Aziz bolalar!
Toshguzar – Boysun – Qumqo'rg'on temiryo'l qurilishining 11-shoxobchasida uch yarim mingdan ortiq bunyodkorlar kecha-yu kunduz mehnat qilishmoqda. Toshkent temiryo'l muhandislari instituti talabalari ham ularning saflarida mehnat qilishmoqda. Yillar o'tadi, bir kun kelib, ular bu to'g'rida faxr, iftixor bilan so'zlaydilar. Ularning birinchi suhbatlaridan bebahra qolmang. Gazetamizning keyingi sonlarida ular to'g'risida qiziqarli maqola, suhbat va lavhalarni e'lon qilib boramiz.

OMON BO'L, BOLAJON!

«Kamolot» YOIH Markaziy kengashi majlislar zalida qandli diabet bilan kasallangan bemor bolalar va o'smirlar uchun xayriya aksiyasi o'tkazadi.

Ushbu xayriya aksiyasida Toshkent viloyatidan ja'mi 180 nafarga yaqin bemor bolalar hamda 20 nafar tuman va shahar bosh endokrinologlari ishtirok etishdi. Tadbir doirasida Respublika o'quvchi yoshlar markazida faoliyat olib borayotgan «Zamonaviy estrada raqs to'garagi a'zolari tomonidan tayyorlangan madaniy dastur, «Turon» yakkakurashi sportchilarining ko'rgazmali chiqishlari bolajonlarga bir olam quvonch bag'ishladi. Viktorina savol-javoblari g'olib bo'lgan bolalar esa sovg'alar bilan taqdirlandilar. Jamg'arma tomonidan barcha bolajonlarga, shuningdek, Sirdaryo viloyati endokrinologlari tomonidan ushbu viloyatdagi bemor bolalarga insulin dori vositasi topshirildi.

DUSHANBAGACHA

Xirmon to'lib to'kildi don,
to'kildi don...

Yurtimiz tabiati xuddi ertaklardagidek mo'jiza-yu sehlarga boy. Bu ta'rifni shoirlar tilida, baxshilar xonishida kuylanganidek, tabiati betakror bo'lgan Chotqol tog' tizmalariga ham nisbat qilishimiz mumkin. Bu go'sha go'zalligi-yu maftunkorligini, ayniqsa, yoz oylarida yana-da ko'proq ko'z-ko'zlaydi. Ta'tilni ana shu tog'lar qo'ynida o'tkazayotgan tengdoshlaringiz esa bu go'zalliklardan yana-da ko'proq bahramand bo'lmoqdalar. Ular orasida Markaziy «Paxtakor» klubi qoshidagi bolalar futbol akademiyasi tarbiyalanuvchilari ham borlar. Yosh sportchilarning ta'tili qanday o'tayotgani bilan tanishish maqsadida Toshkent viloyati, Bo'stonliq tumanida joylashgan «Konstruktor» oromgohiga yo'l oldik. Manzilga yetib borganimizda, bolajonlar saf-saf bo'lib tushlikka ketishayotgan ekan. Dasturxonadagi bulg'orili do'lma va sho'rvaning xushbo'y hidi har qanday injiq, chimxo'r bolaning ham ishtahasini ochib yuborardi.

TA'TIL QALAY, YOSH FUTBOLCHILAR?

jonlar Ma'naviyat va ma'rifat markazi rahbari Muqaddas Muhammadaliyeva boshchiligida oromgohning 40 yoshini hamda mustaqilligimizning 16 yilligini nishonlash uchun qizg'in hozirlik ko'rmoqdalar...

Suhbatga berilib ketib, oromgohning kichikkina suv havzasi bo'yiga yetib kelganimizni ham sezmay qolibmiz. O'zini katta hamshira Zuhra Xabirova deya tanishtirgan opa quyosh nurida jimirlab turgan suvga ta'rif berib, shunday deydilar:

– Bilasizmi, bu oddiy suv emas, buloq suvidir. U oromgohimizga Chorbog'ning Yangiqo'rg'on qishlog'idagi Mozor soy bulog'idan oqib keladi.

Shifobaxsh havzada mazza qilib cho'milayotgan bolajonlarni ham suhbatga tortdik:

TA'TIL KO'PROQ TATIRDI

– Men 9 yoshdaman, oromgohga birinchi kelishim. Ota-onamdan, uyimizdan yiroqda qanday turarkinman, degan hadikda edim. Oromgohimiz direktori Ubaydulla aka Hayitmetov, Muqaddas opa To'xtayeva, tarbiyachi va yetakchilarimizning xushmuomalaliklaridanmi, bu yerga tezda ko'nikdim. O'sha kunning o'zidayoq


6 gektar yerni egal-lagan oromgoh maydo-nida suv havzasi, shinam yotoqxonalar, tabiat burchagi, sport maydonchasi, hatto ota-onalar uchun dam olish maydon-chasi ham mavjud. Shu kunlarda bola-

oromgoh bo'ylab sayohat uyushtirdik, har birimiz o'zimizga yoqqan to'garaklarga qatnay boshladik. Hammasi yaxshiku-ya, oyijonimni sog'inib qolayotganim yomon-da. Qaniydi, onalarimiz ham biz bilan birga dam olishsa... Ta'til yana-da ko'proq tatirdi-da.

SARDOR,
darvozabon

Oromgohda bir kun

«SHARQ BOZORI» QIZIQARLI O'YIN
– Men ham 9 yoshdaman. Oromgohga ikkinchi



– Pazanda oshpazlarimiz oromgohimizda dam olayotgan 415 nafar sportchi bolajonlarimizning og'ziga yoqadigan taomlar tayyorlashga harakat qilishyapti, – deydi oromgoh rahbari Muqaddas To'xtayeva. – Ravshan aka Saidkarimov boshchiligidagi oshpazlarimiz milliy taomlarimizni yana-da mazaliroq chiqishi uchun o'choqlarda pishirishyapti. Shundanmi, oshxonadagi shikoyatlar daftaramiz rahmatnomalar bilan to'lyapti.

marotaba kelishim. Bizni futbolchilar guruhi, deyishadi. Har kuni murabbiymiz bilan toqqa sayrga chiqamiz. Chotqol dengiz ko'lidagi baliqlarni tomosha qilamiz. Bu yerda o'tadigan «Quvnoq startlar», «Istiqlol va men», «Mening diyorum» kabi tadbir va o'yinlarimiz orasida «Sharq bozori» o'yini menga juda yoqdi. U bizni tadbirkorlik va tejankorlikka o'rgatyapti. Uyga borsam, do'stlarimga ham albatta o'rgatib qo'yaman.

YUSUF,
o'ng qanot himoyachisi

«MEN YIG'LOQI EMASMAN...»

O'rtoqlarim meni yig'loqi, deyishyapti. Aslida yig'loqi bola emasman. Lekin nima qilay, oyijonimni juda sog'inib ketyapman-da. Bolalardan berkitib biroz yig'lab olamanda, yana o'ynab ketaveraman. «Yig'loqilardan yaxshi futbolchi chiqmaydi», deya yupatadilar murabbiyimiz Lenur Yeremeyev. Yaxshi futbolchi bo'lish juda qiyin ekan-da...

SHAHZOD,
yarim himoyachi

Ma'mura MADRAHIMOVA yozib oldi

O'quv yilining so'nggi kunlari edi. 4-sinfda «Kim bo'lsam ekan?» mavzusida tarbiyaviy soat bo'ldi. Bolalar kelajakda huquqshunos vazir, elchi, iqtisodchi bo'lmoqchiligi haqida to'lib-toshib gapirishdi. Behzod bo'lsa, «Men temirchi bo'laman, katta bobomdan qolgan ustaxonada ishlayman. Mahallamizdagi fermerlarga bog' va polizda ishlatiladigan ketmon, tessa, xaskash yasab beraman. Ustaxonada ishlash mazza. Shunday qattiq temirning olovda erishini buvajonim qo'l ostida loydek mijig'lanib, bejirim chovli, xokandoz, kapgirga aylanishini mazza qilib kuzataman. Shu paytda buvam ko'zimga sehrigar bo'lib ko'rinadilar», dedi.

– Voy, shundoq a'lochi bola temirchi, taqachi bo'larmish, – kulib yubordi Nosir.
– Kulmanglar, – dedi sinf rahbari Dilbar opa. – Nosir buvasining hunarini davom ettirmoqchi ekan, buning nimasi yomon?!

Nabirasining o'qishdan xomush qaytganini ko'rgan buvasi uni yoniga chaqirdi.
– Opoqdoda, a'lochi bola temirchi usta bo'lsa, uyat bo'ladimi? – deb so'radi ko'zlari javdirab.

– Sirayam uyat emas, hunar o'rganish – faxr. Chinakam hunarmand halol mehnat qiladi. Odamlar og'irini yengil qiladi. Agar uyat bo'lsa, men shug'ullanarmidim?! Bilasan-ku, asl kasbim jurnalist, televideniya ishlayman. Ammo mening bobolarim temirchi usta bo'lishgan, shu yo'l bilan rizqini topib, oila boqishgan. Bobolarim hurmati uchun ham bu hunarni tashlamayman. To'g'ri, hozir aslida bu hunarga uncha zarurat ham yo'qday tuyuladi. Lekin, o'ylagin, Qobil bobong moliga o't o'rish uchun o'roq, Sadir tog'ang dalasidagi ekin tagini yumshatishi uchun tessa bo'lmasa, nima qilishardi? Demak, hunarimiz odamlar og'irini yengil qiladi. Senga bir rivoyat aytib beraman, o'tir:

Aytishlaricha, Quddus qasri qurib bitkazilgach, Sulaymon shoh uni qurishda ishtirok etgan barcha ustalarni ziyofatga chorlabdi. Yig'ilgan mehmonlar noz-ne'matlardan endigina tatib ko'rmoqchi bo'lib turishganda, birdan shoh so'rab qolibdi.

– Xo'sh, aytinlar-chi, bu mo'jizakor qasrning bosh quruvchisi kim? Uning bunyod bo'lishiga kim ko'proq hissa qo'shgan?

G'isht teruvchi o'rnidan turib, bunday debdi:
– Qasrni bizning qo'llarimiz yaratdi, g'isht ustiga g'isht qalab, uni bunyod qildik. Bu mustahkam devorlar, peshtoq va gumbazlar Sulaymon shohni sharflab, asrlar bo'yi turajak.

– To'g'ri, qasrning poydevori tosh-g'ishtdan qurilgan, bu haqda bahs ham bo'lishi mumkin emas, – deya suhbatga aralashibdi duradgor. – Ammo o'zingiz o'ylab ko'ring, terlab ishlaganimizda, qasr shunchalik chiroyli bo'larmidi? Agar biz devorlariga qizil yog'och va Liva kedrlari bilan ishlov bermaganimizda, bu yalang'och devorga qarash sizlarga yoqimli bo'larmidi? Bizning parket esa eng a'lo navli shamshod daraxtidan qilingan, qaragan ko'zni quvontiradi! Biz duradgorlar o'zimizni bu afsonaviy qasrning haqiqiy bunyodkorlari, deb hisoblaymiz.

Kim bo'lsam ekan?

– Binoning zaminiga qaranglar, – deya uning so'zini bo'libdi yer qazuvchi, – agar biz binoning poydevori uchun xandaq qazimaganimizda, mana bu maqtanchoqlar (u g'isht teruvchi va duradgor tomonga bosh silkitib qo'ydi)

bu qasrni tiklay olisharmidi? Birinchi shamoldayoq devoriga qo'shilib bezaklari ham har tomonga sochilib ketardi.

Ammo Sulaymon shoh bekorga dono hisoblanmasdi. U g'isht teruvchini yoniga chaqirib so'rabdi:

– Sening asbobingni kim yasagan?

– Albatta, temirchi-da, – javob qilibdi hayron bo'lgan g'isht teruvchi.

– Senikini-chi? – shoh duradgorga qarabdi.

– Temirchidan boshqa kim bo'lardi? – deb o'ylab ham o'tirmay javob qilibdi duradgor.

– Xo'sh, sening belkurak va cho'kicingni-chi? – yer qazuvchidan qiziqib so'rabdi Sulaymon.

– Bilasiz-ku, podshohim, bularni faqat temirchi yasay oladi, – debdi yer qazuvchi ham. Shunda Sulaymon shoh o'rnidan turibdi-da, burchakda qimtinibgina turgan kishining oldiga boribdi, u kishi temirchi ekan. Shoh uni saroy o'rtasiga boshlab chiqibdi.

– Ko'rib qo'yinglar, qasrning bosh quruvchisi mana shu odam bo'ladi, – deya temirchini o'z yoniga, kimxob yostiqa o'tkazibdi.

– Ana, ko'rdingmi, temirchilik barcha hunarlarning otasi ekan, – debdi buvasi.

– O'rtoqlaringga shuni aytib qo'y. Yaqinda biz bir guruh nemis tadbirkorlari bilan uchrashdik. Ulardan biri juda katta olim ekan. U shunday dedi:

«Agar 6 yoshli bolakay, kelajakda kim bo'lmoqchisan, degan savolga, kulol, ishchi, chilangar, temirchi yoki to'quvchi bo'laman, deb javob bersa, shu mamlakatning kelajagi bor».

Bu fikrga men ham qo'shilaman. Balki kelajakda sen ham zamonaviy kasblardan birini tanlarsan. Lekin bir yigitga yetmish hunar oz, ota-bobolarimiz hurmati uchun temirchilik bilan ham shug'ullanib tursang, nur ustiga a'lo nur bo'lardi, bolam.

Behzod indamay buvasini bo'ynidan quehdi.

Aytin-chi, bolalar, u o'z fikrida qolarmikin? Siz-chi, kelajakda kim bo'lmoqchisiz? Tanlagan kasbingiz va u haqda tushunganingizni bizga yozib yuboring.

Muhabbat HAMIDOVA

SULAYMON SHOHNING SINOVU



Odatda yozgi ta'til kunlarida o'quvchilardan kelayotgan maktublarni ancha kamayardi. Bu yil esa xatlarning cho'g'i yaxshi. Hatto oromgohlarda, tabiat qo'ynida dam olayotgan bolajonlar ham o'z kuzatishlarini qog'ozga tushirib, suratlar chizib yuborishayotgani qiyovtiradi kishini.

Ularni saralab, sahifa tayyorladik. Shoyad, tabiat haqida kuyunib, suyunib yozgan tengdoshlaringizga havas qilib, murg'akkin qalbingizda tabiatga bo'lgan mehr yana-da oshsa.

Sizlardan ham tabiat haqida, mahalliy muammolar haqida maktublarni kutib qolamiz.

Onajonim tabiat

AHIL CHUMOLILAR

Saraton quyoshi beayov qizdirmoqda. Qilt etgan shabada yo'q. Tirik jon borki, o'zini salqinga oladi.

Mitti chumoligina tinchimaydi. U o'z tanasidan ancha katta donni kesak va xor-xaslar orasidan goh sudrab, goh surib, suvsiz ariq qirg'og'iga olib chiqdi. Ariq chuqur, qirg'oqlari tik edi. U duch kelib qolgan bu to'ssiqa bir muddat qarab turdi-da, najot izlab, atrofga yugurdi. Ko'makchi topolmagach, narigi qirg'oqqa tez o'tdi va donni ariq ichiga dumalatdi. Lekin donni u yerdan olib chiqishning o'zi bo'lmadi. Harchand tirishmasin, doni orqaga sirpanib tushib ketaverdi.

Shu payt ikkinchi chumoli ham don sudrab ariqqa keldi va dumalatib yubordi. Birinchi chumoli uning yoniga yugurib bordi va xuddi odamlardek «achomlashdilar». Bir zum maslahatlashgandek, oldingi oyoqlarini qimirlatishdi. Avval birinchi chumolining donini, keyin esa ikkinchisining birgalikda ariqdan olib chiqishdi va uyalarini tomon sudrab ketishdi.

N.MAMADALIYEV,
Namangan viloyati, Uychi tumanidagi 7-maktab

Toshkent shahrining Chilonzor tumanida yashovchi tengdoshingiz Hilola RO'ZIYEVA yuborgan ushbu surat Uchquduq va Zarafshon shaharlari yaqinidagi Davqitav qo'rg'onida tasvirga tushirilgan.

Katta-katta echkiemarlarni sayr qilib yurgan bu qo'rg'on tarixi haqida gazetamizning keyingi sonlarida o'qiydiz.

MOMOJONIM TABIAT

Onajonim tabiat,
Momojonim tabiat,
Tanamdagi og'riqli,
Yarajonim tabiat.

Suyub-suyub ulg'aytgan,
Erka o'sgan bolangman.
Ardoqlagan ko'ksingga,
Oyoq bosgan bolangman.

Quloq tutib dardingni,
Tinglamagan bolangman.
Mehr ko'rib, mehr-la,
Siylamagan bolangman.

Bobom ekan daraxtga,
Bolta urgan men o'zim.
Momom ekan gujumni,
Qurtga bergan men o'zim.

Yaxshi narsang barini,
Yulib-yulib oldim men.
Bag'ringda o'zim tanho,
Hokim bo'lib qoldim men.

Havolar og'irlashdi,
Yomon bo'ldi, ko'p yomon.
Keksayib bo'lding dardmand,
Endi izlayin darmon.

O'zi pishirgan oshdan,
Xasta bo'lgan men - INSON!

Jonajonim tabiat,
Momojonim tabiat.
Dardingga bo'lay darmon,
Onajonim tabiat!

Gulruhsor OLLOBERGANOVA

KECHA

VA

BUGUN

Sehringdan o'rgilay, ona tabiat,
Kechagina bulut to'kardi ko'z yosh.
Bugun esa nurga cho'lg'angan borliq,
Saxiy nurin sochar samodan quyosh.

Dilnavoz SAIDOVA,
Jizzax viloyati, Zomin tumanidagi
1-maktabning 8-sinf o'quvchisi

MEN TARVUZOY BO'LAMAN

Salom bolajonlar! Men Tarvuzoymen! Saxiy Quyosh tafti, momo yer saxovati, bobodehqon mehridan yaralganman. Ona tabiatning mo'jizasi, yashillikka burkangan polizlarning ko'rkiman. Yesangiz, tilimim tilingizni yoradi. So'zlarimga shubha qilsangiz, rasmimni chizib, tahririyatga yuborgan Parkent tumanining Shampant qishlog'idagi 18-o'rtta maktabning 8-sinf o'quvchisi musavvir qiz Fotima Minadirovadan so'rang.

Yoki Jizzax shahrida joylashgan H.Olimjon nomli 21-o'rtta maktabning 8-sinf o'quvchisi Go'zal Sag'dullayeva chizgan rasmdagi tarvuzxo'rlik qilayotgan mana bu bolajonlardan so'rang.



TABIAT SHAYDOSIMAN

Men bolaligimdan o'z tabiat shaydosiman. Uning go'zalliklari, ne'matlaridan hayratlanaman. Ona tabiat bag'rida o'sgan har bir o'simlik, har giyohning foydali ekanligini ham yaxshi bilaman. Shunday ekan, bizga mehr ko'rsatayotgan, nez-u ne'matlari bilan siylayotgan tabiatni ardoqlashimiz, kelajak avlodlarga sog'lomligicha yetkazishimiz lozim deb o'ylayman.

Hozirgi kunda O'zbekiston Milliy universitetining jurnalistika fakultetida tahsil olayman. Shunday bo'lsa-da, bolaligidagi qadrdonim «Tong yulduzi»ni qo'lindan qo'ymayman. Ayniqsa, «Onajonim tabiat» sahifasi menga juda yoqadi.

Foydali o'simliklar haqida eshitgan, bilganlarimni uka va singillarim bilan o'rtoqlashmoqchiman.


Diyora HASANOVA

ALOE GULINING XUSUSIYATLARI

Ko'pchiligimiz uyimizda xonaki gullar, o'simliklar parvarish qilamiz. Ularning parvarishi bir-biridan farq qiladi. Ba'zilar suvsevar bo'lsa, boshqalari, aksincha, quruqlikni yoqtirishadi. Yana shunday o'simliklar ham borki, ular juda foydali va dorivor hisoblanadi. Aloe o'simligi shular sirasiga kiradi. Deraza tokchalaridagi gultuvaklarda yaxshi o'sadigan bu o'simlikning daraxtsimon turi ko'proq o'stiriladi. Yaxshilab parvarish qilinsa, buta shaklida o'sib, barglar yozadi. Xona sharoitida kamdan-kam gullaydi. U me'yorida sug'orishni va har yili ko'chirib o'tkazishni talab etadigan o'simlik. U enidan o'sib chiqqan navdalardan ko'paytiriladi. Barglari ko'pgina kasalliklarni davolashda ishlatiladi. Yangi shirasi esa kuygan yaralarga davo.



LAVLAGINING FOYDASI



Biz aksariyat savzavotlarda inson salomatligi uchun zarur bo'lgan moddalar borligini yaxshi bilamiz. Ko'pchilik bolalar sergo'sht, seryog' taomlarni yoqtirishadi. Lekin bunday taomlarni quruq o'zini yeyish zararli. Ularni oshko'klar, sabzavotlardan tayyorlangan salatlar bilan qo'shib yeyish tavsiya qilinadi. Ayniqsa, qizil lavlagidan tayyorlanadigan salatlar juda foydali.

Lavlagi deyarli hamma yerda o'stiriladi. Biz odatda uning ildiz mevasini iste'mol qilamiz. Lekin ba'zi taomlarga uning bargi ham ishlatiladi ekan. Chunki bargida ham ko'plab darmondorilar, foydali moddalar bor ekan. Lavlagidan turli garnirlar, salatlar, souslar va boshqalar tayyorlashda qovurib, qaynatilib foydalaniladi.

YOVVOYI OSHKO'KLARNING NAFI

Biz deyarli barcha taomlarga oshko'klar solib yeyishga odatlanganmiz. Ko'katlardan, hatto yovvoyi oshko'klarning o'zidan ham talaygina taomlar tayyorlasa bo'larkan. Buning uchun yangi unib chiqqan ko'katlar yaxshilab yuvilib, qiymalanadi. Unga piyoz, jizza va tuxum qo'shib, yog'da qovuriladi. Ulardan ko'k somsa, biyron, chuchvara, patir kabi taomlar tayyorlash mumkin. Tibbiyotda yovvoyi oshko'klardan qon bosimi, semirish va boshqa ko'plab kasalliklarni davolashda foydalaniladi. Ularning tarkibida turli darmondorilar, ovqatlarini xushxo'r qiluvchi, yengil hazm qildiruvchi moddalar bor.

Bilasizmi?

Akulalar bundan 350 million yil avval paydo bo'lgan ekan.

Fanga'noma'lum sababga ko'ra, o'rdakning tovushi hech qachon aks-sado bermaydi.

Jonzotlarning 80 foizini hasharotlar tashkil qilgan ekan.



Qo'y, echkilarimni ham rasmga olyapsizmi?

LIMONZORIMIZGA BIR

KELING...



Biz jannatmakon Bo'stonliq tumanining Soyliq qishlog'ida yashaymiz. Bag'rida yayrab tahsil olayotgan 11-maktabimiz ham tumanning eng so'lim, xushmanzara yerida joylashgan. Uning ko'rkiga ko'rk qo'shish maqsadida bilim maskanimiz hovlisi, bog'iga chiroyli gullar, mevali va manzarali daraxtlar ekanmiz. Hatto kattagina issiqxonamiz ham bor. U yerdagi o'simliklarni ustozimiz Elchi Mirahmedov boshchiligidan parvarishlaymiz. Avvallari u sinf xonalari hamda maktab hovlisini ko'kalzorlashtirish uchun xizmat qilgan bo'lsa, hozirda kattagina limonariya ham barpo etganmiz. Hozirda yiliga 150-200 kilogramm limon olinib, hosilning oldini nafaqadagi ustozlarimizga sovg'a qilamiz. Qolgan qismi sotilib, puli kam ta'minlanganlarga hamda maktab ehtiyojlariga sarflanadi.

Bu mehnatlarimiz bilan ona tabiat himoyasiga oz bo'lsa-da, ulush qo'shayotganimizdan xursandmiz.

Fursat topsangiz, limonzorimizga bir keling, mehmon qilamiz.

Umida MURODOVA



Navoiy viloyati, Zarafshon tumanidagi 13-maktabning 6-sinf o'quvchisi Nodirbek NIZOMOV ushbu rasmi orqali tengdoshlarini ona tabiatni asrashga chaqiribdi.

«OROLLAR» BOSHQOTIRMASI

Ushbu kataklarga harflarni to'g'ri joylashtirib, sayyoramizdagi 7 ta orolning nomini bilib olasiz.

- 1.O'rtta Yer dengizining shimoliy-g'arbidagi orol.
- 2.O'rtta Yer dengizidagi orol.
- 3.Malayya arxipilagining sharqiy qismi.
- 4.Malayya arxipiligidagi eng katta orollardan biri.
- 5.Tinch okeanining g'arbiy qismidagi orol - davlat.
- 6.Osiyoning sharqiy qirg'og'ida joylashgan orol.
- 7.Tinch okeanining g'arbiy qismi (Mikroneziya)dagi arxipilag.

Tuzuvchi: Nodirbek YO'LDOSHEV,
Jizzax viloyati, Zomin tumanidagi 36-maktabning geografiya fani o'qituvchisi

1	O				
2	R				
3	O				
4	L				
5	L				
6	A				
7	R				

Biz ba'zan bolalarni kitob o'qimaslikda ayblaymiz. Lekin ularni bitta shu kitob o'qishga qiziqira olmayotganimiz uchun o'zingizni hech aybdor sezganmisiz? Yoningizga loaqal ikkita bolangizni o'tkazib olib, kitob o'qib berganmisiz? Yaxshi hamki maktabdagi tadbirlar, turli yozuvchi-shoirlar bilan uchrashuvlar bor. Ular farzandlarimizni maktabdagi uchrashuvlar orqali ma'naviy yetuklikka yetaklaydilar. Respublikamizning deyarli barcha viloyatlaridagi ba'zi maktablarda bo'lib, o'quvchilarning «shoir aka»siga aylangan ana shunday ijodkorlarimizdan biri Shukur Qurbondir.

Uchrashuv

Shukur aka bilan suhbatlashganimizda, maktablardan birida bo'lgan qiziqarli uchrashuv haqida so'zlab berdilar...

SHOIR AKA, BIZNING MAKTABGA KELING!

– Bir uchrashuvda bolalar bilan xayrlashay deb tursam, yomg'ir yog'ib yubordi. So'ng, suhbatni yana biroz davom ettirdik. Ularning she'riyatga ixlosi balandligidan nima deyishdi deng: «Yomg'ir tinmasin, shoir akamiz ketmasinlar. Biz ham yozgan she'rlarimizdan o'qib beraylik», deb chug'urlashishdi. Bolalarning ra'yini qaytarib bo'larmidi, o'tirib eshitdim. Tuzukkina she'r yozadigan o'quvchilar ham bor ekan. Shu payt o'ylab qoldim: ular adabiyotga, ma'naviyatimizga bee'tibor emaslar, biz kattalar ba'zan

ularga befarq bo'lamiz. Viloyatlardagi maktablarga ko'proq borsak, o'quvchilarga nur-ziyo ulashsak, deyman. Axir biz shular uchun, kelajagimiz barkamol insonlar qo'lida bo'lishi uchun ijod qilamiz.

Men so'nggi paytlarda qo'liga umuman kitob olmay qo'ygan ba'zi bolalarni eslab: «Balki siz aytayotgan bolalar ham ko'pdir, lekin bugun yoshlar ko'proq radio eshitishga, televizor yoki kompyuterga ishqibozroqlarda», desam o'z o'quvchilarini jondan suygan Shukur aka mening fikrimga unchalik qo'shilmay, yana bir voqeani so'zlab berdilar...

–Yaqinda bosilib chiqqan kitobimni o'quvchilarga taqdim etdim. Ular kitobimni yaxshi qabul qilishdi. Ba'zilariga yetmay ham qolgan ekan, uchrashuv tugagach, «Menga ham kitob topib bering», deb ancha yo'lgacha 3-4 bolalar ketimdan ergashishdi. Kelasi safar sizlarga alohida olib kelaman, hozir darsdan qolmanglar, desam yana chug'urlashishdi. Jarima sifatida ularga yana bir-ikkita she'rimdan aytib berdim, axiyri bolajonlar bilan xayrlashdik. Kitob ololmaganlari eng yoqtirgan she'rlarini yozib olishdi. Bilasizmi, shunday o'quvchilar ko'paysin, deb yuribmunda maktablarda. Fursatdan foydalanib aytmoqchi bo'lganim,



XAYOLPARAST

Hayot IKROMOV

G'ani o'ttirar edi xayollar surib,
Xayolin tez-tez har yoqqa burib.
Ko'rdi u bir mahal kattakon dengiz,
Tushib ketdi G'ani dengizga shu kez.
«Voy, dod!» deb baqirdi, lekin qarasa,
Dengizda emas, u o'tirar darsda...
Xayolida emas olgan bahosi, lekin,
Darsda unga ustoz qo'yibdi «ikki».



MUSICHALAR

Shahnoza ANVAROVA,
Toshkent viloyati,
Piskent tumanidagi
5-o'rta maktab
o'quvchilari

Bizning hovlida bir juft
Musicha yashar edi.
Topgan-tutgan donlarin
Ikkiga bo'lib yerdi.
Nafs-shayton bir kuni
Buzdi ular orasin.
Yaxshi ko'rmay qo'yishdi
Bir-birining bolasin.
Dahanaki jang qildi
Bir kun ular maydonda,
Xudoga yoqmagan ish –
Urush-janjal yomon-da!
Poylab yurgan ekanmi,
O'g'ri mushuk chang soldi.
Chiroyli musichalar,
Qarangki, dumsiz qoldi.

biz bolalar yozuvchi shoirlari hech ham ularni unutib qo'ymasligimiz kerak. Biz hamisha birinchi navbatda bolasini o'ylab yashaydigan millatimiz. O'zim ham shu bolalarni o'ylab yashashga harakat qilayapman.

Bugungi kunda Shukur akaning o'z shogirdlari bor. Va shoir shogirdlarining she'rlarini o'zinikiday qadrlaydi. Ulardan ba'zilarini sizga ham havola qilmoqchimiz.

Sayyora JO'RAYEVA

Murod ABDULLAYEV

Suv keladi mo'ridan,
Yor-yor, yoron-ey!
Mo'ridan ham naridan,
Yor-yor, yoron-ey!
Akaginang aylansin,
Yor-yor, yoron-ey!
Sochlaringni toridan,
Yor-yor, yoron-ey!

Qo'yosh chiqdi falakka,
Yor-yor, yoron-ey!
Olov tushar yurakka,
Yor-yor, yoron-ey!
Akaginang uylandi,
Yor-yor, yoron-ey!
Chiroyli kelinchakka,
Yor-yor, yoron-ey!

Oqqushning to'shi qorday,
Yor-yor, yoron-ey!
Olma-anori borday,
Yor-yor, yoron-ey!
Oy kecha, oydin kecha,
Yor-yor, yoron-ey!
O'g'il bersin qo'chqorday,
Yor-yor, yoron-ey!
Yor-yor, yoron-ey!

Kelinning oldiga tushib kelayotgan qiz-juvonlar-u momolarning lapari ularnikidan ham oshib tushardi...

Nihoyat, gulxan oldida kelin mingashib olgan tulpor kelib to'xtashi bilan hamma bir zum tin olib qoldi. Marosimning eng go'zal daqiqalari yetib kelgandi. Kuyovlarning bashang liboslariga burkangan alp qomat

TO'MARIS ONA

(Esse)



Siparangiz onasi va qarindoshlari tomon egilib ta'zim qildi-da, Zarina mingashgan arg'umoq yoniga o'ktam qadam tashlab bordi. Avval Zarinaning qo'llarini ushladi, bu uning «Yaxshi yetib keldingmi, yorim! Endi izmingni menga ber», degani, minnat-dorchiligi edi. So'ng, kelinni xuddi go'dak bola singari ot ustidan adl ko'tarib olib, yonib turgan gulxan atrofidan uch marta aylantirdi. Shodon qiyqiriqlar, yor-yorlar, doiraning taka-tum sadolari ostida kuyov o'z Zarinasini shohi pardalar bilan ziynatlangan o'toviga olib kirib ketdi.

Gulxan atrofida esa o'smir yigitlar, qiz-juvonlar hamda qiziqchi navkarlarning o'yin-kulgulari yarim tunga qadar davom etdi. O'tovlar oldidagi ochiq maydonlarda kelin-kuyov sha'niga tilaklar-u qutlovlar aytilar, ziyofat qizigandan qizir edi...

Ertanisiga turli yoqlardan kelgan mehmonlar manzillariga jo'nab ketishayotgan mahal, «kelin salom» boshlandi. Zarina eng avval qabila malikasi, massagetlar-u shaklar makon tutgan Turon zamin hukmdori To'maris onaga uch bora egilib, salom berdi.

– Boshing toshdan bo'lsin, ona qizim. Sen endi ham kelinim, ham qizimsan. Ham... – shu chog' uning ovozi titrab ketdi, – ham navkarimsan! Ajdodlarimiz makonini ko'z qoracho'g'idek asraguvchi najotkorlarimizdan

birisan. Bobolarimiz ruhi senga yor bo'lsin, – dedi va oltin taqinchog'-u ziynatlarga qo'shib, oltin sopli xanjar, sopi uzun, uch qismi kalta o'qli yoy ham hadya etdi. Bu ham massagetlar udumi edi: Illo erkag-u ayol Vatanni yovdan birdek himoya qilishga burchli sanalardi.

* * *

...To'y o'tganiga ham mana bir oycha bo'ldi. To'maris ona yana O'kuz bo'yida og'ir xayollarga botib o'tiribdi. Kir qo'shinlari daryoning u betiga uzzu kun xufiyalarini yuborib, kechuvga mos joy axtarmoqda. Demak, savash bo'lishi muqarrar...

Hukmdorning nafrati oshgandan oshib, xayoli tadbir o'ylash bilan band. Dushmanni mahv etmoq uchun qay usulni qo'llamoq kerak? U bilan qaysi joyda jang qilgan ma'qul: ochiq yalanglikdami yoki tog'lar orasidagi qulay manzillarda? Qanday qilsa, dushman u xohlagan joyda yuzma-yuz bo'ladi? Qanday qilsa, yovni yengib, kulini ko'kka sovurish mumkin? O'ylagan sayin o'yining adog'iga yetolmas, ko'rayotgan tadbirlari Kirning mo'r-malaxday bostirib keladigan lashkari oldida unchalik puxta ko'rinmas edi.

Shu tobda uning dushmandan ustun keladigan birgina jihati bor edi: u ham bo'lsa, To'maris ona lashkarlari o'z kindik qoni tomgan Turonzamin uchun, uni yov qo'liga omonsiz bermaslik uchun tomchi qoni qolguncha kurashadi. Dushmanning zaif tomoni esa — uning bosqinchiligida edi. U o'zgalar zaminiga egalik qilib, elini bandi qilish, boyliklarini talash, xullas, turonzaminliklarni esa o'ziga tobe etish uchun kelayotgan edi.

Boshi o'tgan sonlarda.
Davomi bor.

DUNYONI MEHRGA TO'LDIRAMIZ

Bo'stonliq tumanida joylashgan Xumsonga bir borsangiz, qishloqning so'lim tabiati, osmono'par tog'lari, zilol suvlari sizni qayta-qayta quchog'iga chorlayveradi.

Xumson tog'cho'qqisidagi «G'uncha» bolalarni sog'lomlashtirish oromgohi ham ana shu so'lim

maskanda joylashgan.

Tog'ning tikka yo'li bo'ylab oromgohga kirib borganimizda, kun ancha kech bo'lib qolgandi. Oromgoh rahbar o'rinbosari Yulya Umidova bizni qarshi olib, quyidagilarni gapirib berdi:

Ta'til taassurotlari

MOSKVALIK MEHMON

Nurmuhammad Sultonov Moskva shahri, Sushyovskiy tumanidagi 237-maktabning 7-sinf o'quvchisi ekan.

– O'zbekistonning havosi toza. Shuning uchun ham dam olgani «G'uncha» oromgohiga keldim, – deydi u. – Bu yerda sirdaryolik, qoraqalpog'istonlik bolalar bilan do'stlashdim. Iloji bo'lsa, har yili yozgi ta'tilda O'zbekistonga kelaman.

U gapini tugatmasdan «Barcha guruhlar yig'ilsin» degan buyruq eshitildi. Davraga Shoh va go'zal Shahrizoda tashrif buyurishdi.

SHAHRIZODANING ERTAKLARI

– Shohim, qarang, bu yerda yig'ilgan bolalar bir-birlari bilan qadrdon do'st bo'lib olishibdi. Sehri 15 kun ularni shunday bog'lab qo'yibdi-ki, endi xayrlashgilari

kelmayapti. Hozir sizga so'zlaydigan ertagim aynan shu bolalar haqida. Eshitishga tayyormisiz?

Shunday deya, Shahrizoda shohga dam oluvchilar 15 kun davomida nimalar bilan mashg'ul bo'lganlarini ertak tarzida so'zlab berdi. Bolajonlar raqsga tushdilar, uch tilda qo'shiq aytdilar.

XAYRLASHUV GULXANI

So'ngra, katta gulxan yoqildi. Atrof qop-qorong'i. Lovullab yonayotgan gulxan atrofi charog'on. Uning shu'lasida bolajonlarning chehralari yana-da yorqinroq ko'rinadi. Kechki soat 22.00. Oromgohdan uzoqlashayapmiz-u, u yerdagi jo'shqin, iliq, hayajonli kayfiyat qalblarimizni hamon tark etgani yo'q.

Qulog'imizga uzoqdan elas-elas bolalarning ovozlari eshitildi:

*O'ynab-kulib yashaymiz,
Yoshlik davrin suramiz.
O'ynab-kulib dunyoni,
Mehrga to'ldiramiz.*

QORAQALPOQ BOLALARI QURSHOVIDA

Oromgoh sari ichkarilab borarkanmiz, qoraqalpog'istonlik bolalar qurshovida qoldik.

– Bugun do'stlarimiz bilan xayrlashamiz, – deydi Chimboy tumanidagi 38-maktabning 6-sinf o'quvchisi Mamanbey Boynazarov. – Hozir katta gulxan yoqamiz.

– 15 kun davomida sport, raqs to'garaklariga qatnashdik. Suv havzalarida cho'milib, chiniqib ham oldik, – deya suhbatni davom ettirdi To'rtko'l tumanidagi 63-litsey o'quvchisi Umidbek Iskandarov.

Gulchehra Jumanazarova 7-guruh tarbiyachisi ekan.


– O'zim o'qituvchiman, Nukus shahridagi 17-maktabda ingliz tilidan saboq beraman. Oromgohga tarbiyachi bo'lib kelganimdan xursandman. Davramizga boshqa dam oluvchilar ham kelib qo'shilishdi.



Gulyuz BAHODIR qizi

Fanga sayohat

QU YOSHNING «UYI»



Azimov rahbarlik qilgan. Men sizlarga shu inson haqida gapirib beraman, – muallima shunday deb sumkasidan rasm olib, o'quvchilarga ko'rsatdi. – Sodiq Azimov shu kishi bo'ladilar. Ular kosmik nurlar to'g'risida ilmiy izlanishlar olib borganlar. Bolalar, kosmik nurlar nima degani? Biz yashab turgan zamanga quyosh va oy nurlarining behad katta ta'siri bor. Siz bu to'g'rida kelajakda fizika fani orqali xabardor bo'lasiz. Yozda quyosh tik

sa'y-harakatlari bilan kosmik nurlar tarkibida boshqa foydali nurlar, zarralar ham borligi aniqlandiki, ular koinotni o'rganishda, kosmik kemalarning fazoga parvoz qilishida, shuningdek, orbitada fazogirlarning unumli mehnat qilishlarida juda katta samara beradi. Bugungi kunda kosmik nurlar yordamida yerning qalin qatlamini aniqlash, turli xil konlarni topish, ulkan inshootlarni o'rganishda keng foydalanib kelinmoqda. Hali biz bilmagan sirlar ko'p. Sizlar chuqur bilim olib olim bo'lsangizlar, juda ko'p tilsimlarning eshigin ochishga muvaffaq bo'lasiz. Demak, o'qishimiz kerak ekan-a?!

– Yaxshi o'qiyamiz! – deyishdi bolalar chug'urlashib.

– Sodiq Azimov umrining oxirigacha shu yerda mehnat qildi, – deb gapini davom ettirdi muallima. – U O'zbekistonda yuqori energiyalar fizikasiga asos soldi, elektron-yadro jalalarining kashf qilinishiga hissa qo'shdi.

– Men ham katta bo'lsam, shu yerda ishlayman! – dedi bolalardan biri.

– Barakalla! – dedi muallima xursand bo'lib. – Qayerdan ko'p olim chiqsa, o'sha yurtning, xalqining shavkati baland bo'ladi.

«Quyosh» ilmiy majmuasidan chiqayotgan bolalardan biri qo'lini peshonasiga qo'yib samoga tikildi. Kim biladi deysiz, balki shu tengdoshingiz kelajakda o'zga sayyoralarini kashf etishi ham mumkim. Havas insonni baxt-saodatga yetaklaydi, degan gaplar behuda aytilmagan, axir!

Toshkent viloyatining Parkent tumaniga qarashli baland-past adirlarning birida joylashgan bahaybat qabariq oynalar quyoshga ko'ksini ochgan. Bolalar uning yoniga borishgach, qo'llarini peshonalari qo'yib, bo'ynilarini cho'zib, qurilmani qiziqish va hayrat bilan kuzata boshladilar.

– Bu nima, bilasizlarmi, bolalar? – so'radi muallima.

– Buni televizorda ko'rganman! – dedi o'quvchilardan biri.

– Bu quyosh batareyalari, – tushuntirdi o'qituvchi. – «Quyosh» ilmiy ishlab chiqarish majmuasiga qarashli ushbu qurilmani yaratishda xalqimizning atoqli olimlaridan biri, akademik Sodiq

ko'tarilgan sayin kunlar isib, issiq bizga ta'sir eta boshlaydi. Ko'chaga chiqayotganimizda, ota-onalarimiz: «Boshingga bir narsa kiyib ol, issiq urmasin», deya takror-takror tayinlashadi. Bu behuda gaplar emas. Yuqoridan kelayotgan nurlar insonga foydasi bilan birga ziyoni ham bor. Biz ularni kosmik nurlar deb ataymiz. Bu nurlar haqidagi dastlabki fikrlarni Avstriya olimi V.Gess bildirgan edi. So'ngra, 1932-yili amerikalik olim K.D.Anderson, 1936-yili ingliz olimi S.F.Paueller ham shu masala bilan atroflicha shug'ullangan edilar. 50-yillarda yurtdoshimiz Sodiq Azimov ham bu borada qator tajribalar olib borib, kosmik nurlar borasidagi o'zini kashfiyotlarini e'lon qildi. Bu dunyo fani uchun o'ziga xos ilmiy yangiliklar edi. Xususan, yurtdoshimizning

HAM HUNAR, HAM DAROMAD

Har tong Abdullo do'stlari Rixsivoy va Jamshidbek bilan ishbilarmon Jo'rovoy akening korxonasi oshiqshadi. Taxta isi ufarib turadigan bu korxonada har yili yozgi ta'tilda o'quvchilar bilan gavjum bo'ladi. Dastlab oddiy taxtaning uy-ro'zgor anjomlari-yu yumshoq mebellarga aylanishini hayrat bilan tomosha, qilgan bolajonlarning qo'llari ham ancha kelishib qoldi. Taxtakach, o'qlov kabi ahjomlarni bemalol yasashyapti.



Korxonada rahbari Jo'rovoy aka juda sinchkov odam-da, o'ziyam. Shogirdlarini zimdan kuzatadi. Ana, yuragida o'ti bor Abdullo randalangan taxtani ehtiyotkorlik bilan bir chetga olib qo'ydi. Rixsivoy esa betartib bo'lib yotgan mixlarni taxlayapti. Bu ikki do'st shu darajada ishga berilib ketish-

ganki, ustozlarining qarab turganini ham payqashmayapti. Yaqinginda mayda anjomlar yasab yurgan bu ziyrak bolalar katta shkaf yasashga ham o'z hissalarini qo'shishdi. Ishlab topgan pullarini esa oyijonlariga keltirib berishdi. Muqaddas opa o'g'li Rixsivoyning birinchi maoshini olib, uzoq duo qildilar-da, bu pullariga maktab bozorini qilgin, dedilar. Shodlanmay bo'ladimi, o'gli ko'cha changitib yurmay, hozirdanoq bir hunarning boshini tutyapti-ku, axir.

Nargiza ABDULLAYEVA

OLMA DARAXTIDA NIMA O'SADI?

Nikanyu va Mikanyu Olma ekishdi. Kun o'tmay mevasiga Ko'zin tikishdi. Uchinchi kun deganda Ko'rindi hosil. Mushtdekkina bir nima, Bir nima - sarxil! Shaftoli, yo'q, o'rik deb, Tortishdi ancha. Qarasalar yaxshiroq, Ekan chumchuqcha!

OYMOMA

-Oymomajon, kumush oymoma, Ayt, nimaga xomushsan va jim? -Huv qorong'i o'rmon qa'riga, Tushib ketdi kecha yulduzim. -Oymomajon, xafa bo'lma, qo'y, Ozor chekma o'ylanib-horib. Yulduzingni topib beraman, Erta tongda o'rmonga borib.



Leon BRIEDIS, latish shoiri

Frantisek GRUBIN, chex shoiri

Abdurahmon AKBAR tarjimai

BIZ KATTALARNING VAZIFASI

-Viloyatimizda 539 ta maktab bo'lsa, ularning deyarli barchasida ko'plab iqtidorli o'quvchilar tahsil olishadi. Men esa ana shunday umidli yoshlarimiz bilan ish olib boraman. Xiva tumanidagi 16-maktabning 8-sinf o'quvchisi Matluba Egamberganova ana shunday shogirdlarimizdan biri. Maktabda a'lo baholarga

o'qiydigan, insholar tanlovlarida g'oliblikni qo'ldan bermaydigan bu qizimizning she'rlarini bir eshitsangiz, Urgench shahridagi 47-maktabning 9-sinf o'quvchisi Laylo Rahimova chizgan miniatyura asarlarini bir ko'rsangiz edi. Xiva tumanidagi 57-ixtisoslashgan maktab o'quvchisi Shohista Sapayeva esa biologiya sohasi bo'yicha ilmiy izlanishlar olib boryapti. Cho'l zonasida o'sayotgan shifobaxsh o'simliklar, gullar, qushlarning oilalarini o'rganyapti. Urgench tumanidagi 38-maktabning 8-sinf o'quvchisi Nilufar Matkarimova, 36-maktab o'quvchisi Dilrabo Matkarimova ham adabiyotga, she'riyatga mehr qo'ygan yaxshigina ijodkor qizlarimizdan. Ularning ham Zulfiyaxonim qizlari safidan munosib o'rin olishlariga umid qilamiz.

Viloyatimizdagi har bir maktab qoshida yozgi iste'dod maktablari ochilgan bo'lib, o'quvchilar o'z qiziqishlariga ko'ra zardo'zlik, duradgorlik, yog'och o'ymakorligi kabi to'garaklarda shug'ullanishyapti. Xiva shahridagi «Ichonqal'a» qo'riqxonasida «ustoz-shogird» an'anasiga ko'ra ko'plab to'garaklar faoliyat yurityapti. U yerdagi mohir ustalarga shogird tushgan o'g'il-qizlar unutilib ketayotgan misgarlik, kanda-korlik, yog'och o'ymakorligi, kulolchilik kabi hunarlarning hadisini olishyapti.

Kuni kecha Xorazm viloyati Xalq ta'limi boshqarmasi bosh uslubchisi, axborot xizmati rahbari Zuhra Ro'zmetova tahririyatimiz mehmoni bo'ldilar. U kishi «Tong yulduzi»ning har bir sonini maroq bilan o'qib borar ekanlar. Suhbatimiz asosan yoshlar xususida bordi. Biz u kishidan xorazmlik yoshlar haqida ham so'zlab berishni iltimos qildik:



ayting-chi, bu alp qomat yigitlarimiz-u chevar, lozar qizlarimizning parilardan qayerlari kam?..

Ijodkorning qalbini ijodkor yaxshi tushunadi, degan gapda jon bor. Zuhra opaning o'zlari ham yaxshigina qalamkash bo'lmaganlarida, shogirdlari haqida bunchalar to'liqlanib, hayajonlanib, quvonib so'zlamagan bo'lardilar. Zero, zar qadrini zargar biladi, deb bejizga aytilmagan.

Feruza JALILOVA suhbatlashdi

Quyida opaning shogirdlari ijodidan namunalar o'qiydiz. Gazetamizning keyingi sonlaridan birida esa Zuhra opaning ijodi bilan ham tanishasiz.

SOAT

Chiq-chiq etib tolmaydi,
Uzoqqa ketolmaydi.
Goh qaragam u yoqda,
Goh qaragam bu yoqda.
Soatim shunday do'stlar,
Faqat foydani ko'zlar.

TUN

Dala-dashtni qoplaydi tuman,
Tushib kelar asta qorong'u.
Barcha uxlab yotgan pallada,
Ko'zlarimdan qochadi uyqu.
Nimanidir izlar ko'zlarim,
Birdan o'ychan bo'lib qolaman.
Qalamimni qo'limga olib,
Sokin tundan ilhom olaman.

Matluba EGAMBERGANOVA



Muassislar:

O'zbekiston matbuot va axborot agentligi,
O'zbekiston Respublikasi Xalq ta'limi vazirligi,
«KAMOLOT» Yoshlar ijtimoiy harakati,
«SOG'LOM AVLOD UCHUN» hukumatga qarashli bo'lmagan xalqaro xayriya jamg'armasi

BOSH MUHARRIR:
To'lqin HAYITOV

Dizayner va sahifalovechi:
Fazliddin SHOYODGOROV

Navbatchi:
Ma'mura MADRAHIMOVA

Gazeta O'zbekiston matbuot va axborot agentligida 0208-raqam bilan 2007-yil 2-fevralda ro'yxatdan o'tgan.

TAHRIR HAY'ATI:
Turobjon JO'RAYEV,
Dilbar ALIMJONOVA,
Qahramon QURANBOYEV,
Jabbor RAZZOQOV
(«O'zbekiston» NMIU Bosh muharrir o'rinbosari),
Dilmurod RAHMATILLAYEV,
Dilshoda DADAJONOVA,
Feruza JALILOVA
(Bosh muharrir o'rinbosari),
Sobirjon SHARIPOV,
Ergashvoy SARIQOV.

Manzillimiz:
700129,
Toshkent shahri,
Navoiy ko'chasi, 30-uy.
Obuna indeksi: 198.
e-mail: tong1924@mail.ru
Tel: 144-27-25 144-63-08
Tel/ faks: (99871) 144-38-10

Rassomlar:
Nodira MIRZAYEVA,
Feruza MATYOQUBOV.

Noshir:
«O'zbekiston» nashriyot-matbaa ijodiy uyi.
Gazeta «O'zbekiston» nashriyot-matbaa ijodiy uyi kompyuter bo'limida terib sahifalandi va chop etildi.
Gazeta haftaning dushanba kuni chiqadi. Hajmi A-3, 2 bosma taboq.
Adadi - 20641
Buyurtma N: J 3871